

# Il betun en l'Engiadin'ota è in problem existenzial

■ (anr/vi) Il boom da bajegiar en l'Engiadin'ota munta in problem existenzial, scriva il «Tages-Anzeiger» dal glindesdi sin il frontispizi. El descriva era ina obscura midada da zona da bajegiar a Silvaplauna. En l'artitgel vegn cità Hansjörg Danuser, il directur da cura da San Murezzan. L'Engiadin'ota haja be in problem. Quai saja in problem existenzial, numadamain las abitaziuns da vacanzas. Il trumf da l'Engiadin'ota saja la simbiosa tranter confort e natira. Questa simbiosa saja periclitada a moda acuta.

## Miraglia cun schalusias serradas

Da preschent ha l'Engiadin'ota radund 100 000 letgs, 66 000 da quels stattan en abitaziuns da vacanzas. Quellas vegnan duvradas radund tschintg emnas ad onn. 47 emnas restan ellas vidas. «L'Engiadin'ota è sin il precint da cuvrir en cun betun sia cuntrada e natira», scriva il «Tages-Anzeiger». Uschia pericliteschia la regiun il chapital dal qual la vallada sa nutreschia.

Il hotel «Guardalej» en l'Engiadin'ota na dastgass en sasez betg pli purtar quest

num, meglie fiss il num «Guardamur» damai ch'ins vesa dal hotel anora be pli miraglia da chasas da vacanzas cun schalusias serradas.

## Daners da la bursa van en l'Engiadina

Il boom dad abitaziuns ha per consequenza che l'infrastructura vegn scuflada si a moda surdimensionada. Ils giasts vegnan gea tuts tranter Nadal e Bumaun e durant las vacanzas da sport. L'infrastructura da traffic sto sa drizzar tenor il chatsch grond cura che 100 000 persunas e bunamain tuttina blers autos sa fultschan tras la val. Lura sumiglia la fulla da traffic quella da Turitg. Questa infrastruttura stenschentia medemamain la cuntrada cun betun.

En l'Engiadin'ota na senta nagin inatg da la crisa che regia en il rest da la Svizra. L'industria da bajegiar flureschia, scriva il «Tages-Anzeiger». «Danunder vegnan quests daners?» Blers che hajan pli baud speculà a la bursa, investeschian oz pli gugent en immobilias. Ed ils investaders hajan para ina preferenza per il terren en l'Engiadin'ota.

## Ils critichers duain s'engaschar

En il commentari sin il frontispizi avertescha il schurnalist Hannes Nussbaumer che la Svizra possedia exact ils products da luxus che vegnian tschertgadas en il futur: «Ina natira intacta, quietezza, aria netta ed in panorama alpin imposant.»

Blers onns saja il turissem e l'industria da bajegiar ids maun en maun ed haja già la medema finamira. Oz s'opponian las finamiras da las duas industrias. L'industria da bajegiar possedia dentant meglras chartas, perquai ch'ella saja represchentada en tuts gremis politics. «Lamentar sur da quai è ina schleta stgisa en ina democrazia», di Nussbaumer. I dovria l'engaschament dals critichers.

L'artitgel descriva era a moda minuziosa la vendita da la parzella nr. 40 a Silvaplauna l'onn 2001. Curt suenter la vendita è la parzella vegnida classifitgada enturn en la zona da bajegiar. Ils votants da Silvaplauna han «senza realisar» approvà la midada. Il chantun ha dentant franà la midada. Il president da vischnanca, ch'è era engaschà en la branscha d'immobilias, aveva promovì la midada.



Il chapital per il futur dal turissem vegn periclità dal boom da construcziun. FOTO P. DE JONG